



Il cumponist che avra fanestras

Il cumponist e pedagog da musica, Peter Appenzeller, experimentescha era gugent cun tuns.

5



Ovras da vaider particularas a Ftan

Regina Staubli experimentescha dapi blers onns cun la cumbinaziun da vaider e colurs d'acril.

9

DIE SÜDOSTSCHWEIZ

LA QUOTIDIANA

Redacziun: Via comerciala 22, 7007 Cuiria, tel. 081 920 07 10, fax 081 920 07 15

Plazza d'editura duai restar tar almain 50%

■ (rtr) L'anteriu cussegl editorial da la Chasa Editura Rumantscha CER pretenda che la plazza da l'editura vegnia mantegnida cun in grad d'occupaziun d'almain 50%, cun ina direziun independenta e dotata cun 150 000 francs ad onn. Uschiglio vul el ch'i vegnia proponi in'alternativa valaivla. Ensem cun l'Uffizi da cultura dal Grischun ristgia la Lia

Rumantscha numnadain da ruinar la Chasa Editura Rumantscha cun marginalisar quella e duvrar quai sco alibi per calmar l'Uffizi federal da cultura. Fatg saja ch'i na manchian betg ils raps, mabain l'interess per la litteratura rumantscha, scriva l'anteriu CER enavant.

> PAGINA 2

Giubileum cun Lords e Ladys

DA HANS HUONDER / ANR

■ Avon 25 onns ei la Gruppa da teater Mustér vegnida fundada e dapi lu se presenta ella regolarmente sin tribuna. In ulteriu toc presenta ella las proximas jamnas. Igl act da fundaziun dalla gruppa il zercladur 1988 ei seplegus en preschientscha da 18 persunas fermamein intenziunadas da reactivar il teater popular a Mustér. La finamira ei reussida. Da quei dat l'activitad dils davos 25 onns perdetga. En quei interval ha la gruppa numnadamein presentau 22 tocs, ina suletta ga

eis ei buca stau ina cumedia. Ton l'iniziata principala dalla gruppa Giuseppa Hosang-Flepp sco il president e reschissur actual Sigisbert Beer ein loschs dallas prestaziuns. In problem resta denton la recrutaziun d'acturas ed acturs giuvs. Tonaton consista la gruppa aunc oz d'in diember da giugaduras e giugadurs che garrantescha igl avegnir. Sonda proxima ei premiera d'in ulteriu toc daus dalla gruppa. Lords e Ladys vegnan a far honur allas preparativas per in teater.

> PAGINA 6



Dapi 25 onns viva il teater popular puspei a Mustér. Nossa foto muossa ina scena ord ina dallas diversas cumedias. FOTO H. HUONDER

Cologna es idol, ma eir reclama perfetta

■ (anr/mfo) Cun ragiundscher la seguonda plazza pro'l Tour de Ski ha Dario Cologna darcheu üna vouta pisserà per superbgia e motivaziun in sia patria ed illa regiun. Giuvnas passlunghistas e giuvnas passlunghistas vezzan il exaimpel da Dario Cologna, il qual es «ün dad els», la pussibilità da ragiundscher gronds böts. Il star da passlung es

per els nempe ün idol: Qualchün chi'd es eir creschü sü illa regiun periferica e chi ha grazcha a seis sport e seis ingaschamaint ragiunt cha tuot il muond dal sport da passlung discuorra dad el. La destinaziun, ma impustüt la Val Müstair, po profiter da l'effet da reclama.

> PAGINA 9

RECLAMA

Service!
0848 724 824
SCHUBIGER
HAUSHALT KÜCHEN BÄDER

Servetsch d'abunents e da distribuziun: tel. 0844 226 226 mail: abo@suedostschweiz.ch

9 771424 749004 20002



Per pudair ademplir ils basegns d'ina famiglia moderna basegni adattaziuns era tar la constituziun federala. KY

La famiglia moderna pretenda adattaziuns

DA LUCAS DEPLAZES / ANR

■ Il cussegl federal ed il parlament pretendan ina midada da la constituziun federala che lubescha a las dunnas da lubinar meglier la tgira da lur uffants e l'activitad da gudogn u la furmaziun. La situaziun da las dunnas è sa midada e pretenda adattaziuns. Las dunnas èn ozendi bain scoladas ed integradas en la professiun. Savens sa chattan ellas en il dilemma tranter avair famiglia u cunti-

nuar cun l'activitad professiunala. L'economia ha basegn da las dunnas. Per pussibilitar usch bain l'activitad da gudogn e l'incumbenza da mamma èn mesiras adequatas necessarias, sco canortas, maisas da mezdi u centers dal di per uffants. Ils custs – principalmain per ils chantuns – na sajan anc betg calculabels. Pro famiglia ha preschentà ier a Berna a las medias sia posiziun. La midada n'è betg contestada e vegn probabel a restar in pau en l'umbira da las

duas autras votaziuns dals 3 da mars proxim. Da menziunar è dentant che la confederaziun sustegna gia dapi onns la creaziun da plazzas complementaras per tgirar uffants pitschens. Quests meds finanzials na sajan betg suffizients, han constatà exponents da Pro famiglia. Vitiers vegn che adina dapi chantuns incorporeschan ils uffants tranter 4 e 5 onns en la scola primara publica.

> COMMENTARI E PAGINA 3

Ina idea da success

151 participonts al Surselva Classic

■ (anr/gv) Al secund Surselva Classic han ils curriders da cuorsa liunga gudiu 13 uras da cumpignia senza squetsch dil temps. Ils participonts han survegniu solver, gentar e proviantaziun abundonta sil viadi da Trun a Mustér ed anavos. Muort il sustegn da Parc Adula han ils participonts saviu guder quella purschida per sulet 45 francs. Tier la purschida culinaria semtgada dils commembers dil Center sursilvan d'agricultura ha ei dau ina loipa da buna qualitat per la spassegiada ed in servis d'unscher sco el cup mundial. Aluis Tambornino, il president dil comite d'organisaziun, ha gia fixau il termin pil tierz Surselva Classic. «Quel ha liug ils 4 da schaner 2014». Sco el ha puntuau tschentien ils organisaturs buc



Fatschas rientas ein stadas da veser savens al secund Surselva Classic. FOTO G. VENZIN

il diember el center, mobein la qualitat. El ha era menziunau la creaziun da valur digl eveniment: «Il Surselva Classic ha va-

lur cuzzonta. L'entira sviulta resta ella regiun.»

> PAGINA 4

COMMENTARI

Ch'ins seigi sincers

DA LUCAS DEPLAZES

Is exponents da Pro famiglia pendan vid l'iniziativa la tezla «Gie alla famiglia». Ch'ins seigi sincers! En emprema lingia setracti da crear novas structurass statalas (canortas, meisas dil di e centers da tgira) per mirar dils affons da mummas cun ina activitad da gudogn. L'iniziativa vegn ord il ravugl dil parlament. Ella ei buca la veglia da silmeins 100 000 umens e dunnas che han suttascret ina iniziativa dil pievel, sco usitau. Cheu ei il cussegl federal pli sincers en sias explicaziuns da votaziun, sch'el scriva leu: «Il nov artitgel oblighescha la confederaziun ed ils chantuns da promover la cumpatibilitad da la famiglia cun in'activitad da gudogn u cun ina furmaziun.»

Cert! La situaziun dallas famiglias ei semidada e pretenda adattaziuns per pussibilitar allas mummas ina activitad professiunala. Las dunnas han oz las medemas pussivladads da scolaziun sco ils umens e vulan nezegiar quella era finanzialmeins. Ina gronda maioritad dil parlament pretenda perquei ina adattaziun dallas structurass da tgira per mummas che vulan restar ella professiun. Ina minoritad fa attents als cuosts supplementars, alla nova dependenza dil stadi ed alla sminuziun dalla atgna responsablada. Il pievel ha us in davos plaid el capetel.

La tendenza dils davos decennis da surdar adina dapi incumbensas socialas al stadi ei la fallida via. Encunter la midada incaminada dil parlament – che tschenta igl interess dallas mummas modernas el center e buca la famiglia – vegn ei strusch a dar opposiziun, dano dalla dretga. L'influenza dallas dunnas sil palancau politic naziunal ei evidenta e fa tema a biars umens che tremblan per lur reelecziun. Denton – cun duas bialas pagas il meins selai la tgira dils affons ordeifer casa era sliagar senza il stadi, quitass ins!